



Bosnia and Herzegovina
Federation of Bosnia and Herzegovina

CANTON SARAJEVO
Ministry of Economy

Broj: 07-06-15-25484/26
Sarajevo, 14.05.2026. godine

Na osnovu člana 4. stav (1) Pravilnika o postupcima u provođenju programa razvoja male privrede ("Službene novine Kantona Sarajevo", broj 17/25), a u skladu sa Odlukom o usvajanju Godišnjeg plana provođenja Programa razvoja male privrede za 2026. godinu, broj: 02-04-22645-35/26 od 30.04.2026. godine koja je donesena na 126. sjednici Vlade Kantona Sarajevo održanoj 30.04.2026. godine, Ministarstvo privrede Kantona Sarajevo objavljuje

JAVNI POZIV
za dostavljanje prijave
u svrhu dodjele poticajnih sredstava za nova ulaganja
u tehnološku modernizaciju i primjenu standarda kvalitete

I PREDMET POZIVA

Predmet Javnog poziva je dodjela poticajnih sredstava za nova ulaganja u tehnološku modernizaciju i primjenu standarda kvalitete subjekata male privrede koji su kao takvi definisani Zakonom o poticaju razvoja male privrede ("Službene novine Kantona Sarajevo", broj 29/15) (u daljnjem tekstu: subjekt male privrede).

II PRAVO UČEŠĆA

Pravo na dodjelu poticajnih sredstava po ovom Javnom pozivu može ostvariti subjekt male privrede, koji podnese prijavu na ovaj Javni poziv i:

- 1) ako je registrovan najkasnije do 31.12.2024. godine,
- 2) ako ima najmanje jednog zaposlenog na neodređeno vrijeme u punom radnom vremenu (vlasnik ili jedan zaposlenik),
- 3) ako obavlja osnovnu djelatnost iz Tabele 1. ovog Poglavlja,
- 4) ako je njegovo sjedište na području Kantona Sarajevo,
- 5) ako je u prijavi na Javni poziv dostavio predračun/profakturu/ponudu o prihvatljivim troškovima iz Poglavlja IV ovog Javnog poziva,
- 6) ako je dostavio prijavu u skladu sa ovim Javnim pozivom,
- 7) ako ispunjava sve ostale uslove iz ovog Javnog poziva i
- 8) ako je primjenom pravila i kriterija za odabir korisnika sredstava iz Poglavlja VIII tačka b) ovog Javnog poziva i limita ukupno planiranih sredstava iz Poglavlja III ovog Javnog poziva odabran kao korisnik sredstava.



Tabela 1. Popis registrovanih osnovnih djelatnosti obuhvaćenih Javnim pozivom

Popis registrovanih osnovnih djelatnosti obuhvaćenih Javnim pozivom		
Područje prema KD BiH 2010	Naziv područja prema KD BiH 2010	Obuhvaćene šifre djelatnosti iz područja prema KD BiH 2010
C	Prerađivačka industrija	(10.11-10.92), 11.07, (13.10-18.20), (20.11-25.30) i (25.50-33.20)
D	Proizvodnja i snabdijevanje električnom energijom, plinom, parom i klimatizacija	35.11
E	Opskrba vodom; uklanjanje otpadnih voda, gospodarenje otpadom te sanacije okoliša	38.11, 38.12, 38.21, 38.22, 38.31 i 38.32
F	Građevinarstvo	(41.10-43.99)
G	Trgovina na veliko i na malo; Popravak motornih vozila i motocikala	45.20
H	Prevoz i skladištenje	49.31, 49.39, 49.41, 49.42, 52.10, 52.21, 52.23, 52.24 i 52.29
I	Djelatnosti pružanja smještaja te pripreme i usluživanja hrane	(55.10-56.29)
J	Informacije i komunikacije	(58.11-63.99)
M	Stručne, znanstvene i tehničke djelatnosti	(69.10-75.00)
N	Administrativne i pomoćne uslužne djelatnosti	(79.11-79.90), (81.21-81.30), 82.11 i 82.20
P	Obrazovanje	85.10 i (85.51-85.60)
Q	Djelatnosti zdravstvene zaštite i socijalne skrbi	(86.21-88.99)
S	Ostale uslužne djelatnosti	(95.11-96.04)

III IZNOS SREDSTAVA

Ukupan planirani iznos sredstava (limit): Ukupan planirani iznos sredstava (limit) za refundiranje prihvatljivih troškova po ovom Javnom pozivu je **1.800.000,00 KM**, a ova finansijska sredstva utvrđena su u Budžetu Kantona Sarajevo za 2026. godinu, na poziciji "Poticaj razvoju male privrede", ekonomski kod 614500, subanalitika IAP 005 u Godišnjem planu provođenja Programa razvoja male



privrede za 2026. godinu, broj: 02-04-22645-35.1/26 od 30.04.2026. godine (u daljnjem tekstu: Godišnji plan).

Maksimalni iznos poticajnih sredstava po pojedinačnom korisniku: Maksimalni iznos poticajnih sredstava po pojedinačnom korisniku je 50.000,00 KM, a sredstva se dodjeljuju u iznosu do 50% dokazanih prihvatljivih troškova iz Poglavlja IV ovog Javnog poziva. Minimalni iznos prihvatljivih troškova koji mogu biti predmetom refundacije je 3.000,00 KM.

IV PRIHVATLJIVI I NEPRIHVATLJIVI TROŠKOVI

Prihvatljivi troškovi koji su predmet refundiranja po ovom Javnom pozivu su troškovi nastali i plaćeni nakon dana objave Obavještenja o ovom Javnom pozivu u "Službenim novinama Kantona Sarajevo" do roka za dostavljanje dokaza o njihovom nastanku i plaćanju koji će biti propisan ugovorom o dodjeli poticajnih sredstava. Ovi prihvatljivi troškovi koji su direktno i/ili indirektno neophodni za obavljanje osnovne djelatnosti podnosioca prijave, odnose se na:

- 1) kupovinu mašina, alata, opreme i tehnike (osim mobilnog telefona) koja će se koristiti u vremenu dužem od jedne godine, a koja nije starija od deset godina;
- 2) digitalizaciju poslovanja (što uključuje troškove izrade integralnog informacionog sistema, web hosting, business e-mail hosting, korporativne informativne web stranice, izradu webshop platformi, razvoj mobilnih aplikacija, i sl.);
- 3) jačanje konkurentnosti kroz uvođenje sistema međunarodnih standarda kvalitete, odnosno angažman registrovanih institucija za pružanje odgovarajućih konsultantskih usluga i edukacije za certificiranje sistema i certificiranje proizvoda (CE oznaka) i sticanje prava ili obnavljanje upotrebe: ISO, HACCP, HALAL i drugih međunarodnih standarda i
- 4) unapređenje standarda kvaliteta kroz stručno usavršavanje zaposlenika.

Napomena 1: Predmet nabavke iz tačaka 1), 2), 3) i 4) ovog poglavlja mora dobavljati poslovni subjekt koji je registrovan i obavlja odnosnu djelatnost u skladu sa zakonskim propisima.

Napomena 2: U okviru ovog Javnog poziva, refundacija troškova je moguća samo do maksimalno pet stavki u nabavci. Ukupna količina stavki za koju se traži refundacija ne smije prelaziti pet komada. Također, pojedinačna stavka za koju se traži refundacija ne može iznositi manje od 500,00 KM. Ako podnosilac prijave u prijavi dostavi dokumentaciju koja se odnosi na više od pet stavki i/ili pet komada stavki i/ili koja se odnosi na pojedinačnu stavku čiji je iznos niži od 500,00 KM, ovaj podnosilac prijave bit će isključen iz postupka dodjele poticajnih sredstava.

Napomena 3: Kada je u pitanju nabavka robe ili usluga čija se količina izražava u mjernim jedinicama kao što su m², m³ i sati, jednom stavkom smatra se nabavka istovrsne robe ili usluge bez obzira na ukupnu količinu izraženu u naprijed navedenim mjernim jedinicama, pod uslovom da je nabavljena od jednog dobavljača i obuhvaćena jednim ugovorom ili računom (npr. nabavka skele).

Napomena 4: Kada je u pitanju nabavka softvera, jednom stavkom smatra se nabavka jednog softverskog rješenja ili sistema, bez obzira na broj pojedinačnih stavki iskazanih na računom (npr. licence, korisnički nalozi, moduli, održavanje), pod uslovom da čine jedinstvenu funkcionalnu cjelinu i da su nabavljeni od jednog dobavljača na osnovu jednog ugovora ili računa.

Napomena 5: Kada je u pitanju trošak edukacije (vezane za osnovnu djelatnost), jednom stavkom smatra se edukacija po samo jednoj temi stručnog usavršavanja kojoj je pristupio jedan ili više zaposlenika, a organizuje je isti pružalac usluge.

Napomena 6: Podnosilac prijave dužan je u prijavnom obrascu navesti tačan naziv svake od pojedinačnih stavki za koje traži refundaciju, količine ovih stavki i njihove cijene. U slučaju da nije moguće dostaviti dokumentaciju kojom se dokazuje trošak po prednje navedenim stavkama, količinama i cijenama bez dostavljanja dokumentacije koja se odnosi na druge stavke za koje se ne traži refundacija, cijelit će se informacija iz prijavnog obrasca zajedno sa dostavljenim dokazima.



Tabela 2. Primjer prihvatljivog broja stavki, količine i cijene

Rb	Naziv stavke	Količina	Cijena sa PDV-e	
1	Volkswagen transporter T6	1	50.000,00	Prihvatljivo
2	Kombinovani farmaceutski frižider sa zamrzivačem	2	8.000,00	
3	Laboratorijski stol sa staklenom površinom	1	1.000,00	
4	Skela	360m ²	35.000,00	

Tabela 3. Primjer neprihvatljivog broja stavki, količine i cijene

Rb	Naziv stavke	Količina	Cijena sa PDV-e	
1	Volkswagen transporter T6	1	50.000,00	Neprihvatljivo (navedeno više od pet stavki, navedeno više od pet komada stavki i za stavku pod red.br. 5 navedena je cijena niža od 500,00 KM)
2	Kombinovani farmaceutski frižider sa zamrzivačem	3	8.000,00	
3	Laboratorijski stol sa staklenom površinom	1	1.000,00	
4	Kombinovani laboratorijski zamrzivač sa frižiderom	1	10.000,00	
5	Laboratorijska radna stolica	1	180,00	
6	Laptop	1	1.000,00	

Napomena 7: Podnosiocima prijave koji su registrovani u sistemu PDV-a obračunati i iskazani PDV na dostavljenoj dokumentaciji kojom se dokazuje trošak za refundaciju nije prihvatljiv trošak, dok za podnosiocima prijave koji nisu u sistemu PDV-a, obračunati i iskazani PDV na dostavljenoj dokumentaciji kojom se dokazuje trošak za refundaciju jeste prihvatljiv trošak. Također, troškovi carine i prevoza nisu prihvatljivi troškovi.

Napomena 8: Privredni subjekt koji je za bilo koju navedenu namjenu iz tačaka 1), 2), 3) i 4) ovog poglavlja koristio subvenciju, donaciju ili drugu finansijsku pomoć, ne može ostvariti pravo na refundaciju po ovom Javnom pozivu.

Neprihvatljivi troškovi: kupovina zemljišta, stana/kuće, vanjski građevinski radovi i nabavka, kupovina i najam svih vrsta motornih vozila, osim nabavke teretnih vozila i radnih mašina registrovanih na odnosni subjekt male privrede, troškovi električne energije, vode i drugi komunalni troškovi, troškovi repromaterijala, opreme, te svi ostali troškovi koji nisu navedeni kao prihvatljivi.

V SADRŽAJ PRIJAVE NA JAVNI POZIV

Podnosilac prijave na Javni poziv mora dostaviti prijavu koja uključuje sljedeće:

- 1) **Prijavni obrazac**, u potpunosti popunjen, potpisan od ovlaštenog lica i ovjeren pečatom podnosioca prijave. Podnosilac prijave ne smije mijenjati niti dopunjavati tekst prijavnog obrasca. Prijava se izrađuje na način da čini cjelinu, a prijavni obrazac mora biti popunjen isključivo elektronskim putem;
- 2) **Opće isprave i drugu opću dokumentaciju**, kako slijedi:
 - a) Aktuelni izvod iz sudskog registra za podnosioca prijave - pravno lice, ne stariji od 90 dana od dana objave Obavještenja o Javnom pozivu u "Službenim novinama Kantona Sarajevo", a za podnosioca prijave - fizičko lice koje obavlja registrovanu poslovnu djelatnost, rješenje o registraciji nadležnog registracijskog organa (original ili fotokopija ovjerena od nadležnog organa - općina/notar);
 - b) Uvjerenje Općinskog suda u Sarajevu kojim podnosilac prijave (pravno lice/poslovni subjekt) dokazuje da pred sudovima na području Bosne i Hercegovine nije podignuta optužnica protiv njega koja je stupila na pravnu snagu, odnosno da nije potvrđena optužnica, a niti je izrečena osuđujuća presuda za krivično djelo sa propisanom kaznom zatvora do pet godina ili novčanom kaznom kao glavnom kaznom;



- c) Uvjerenje Općinskog suda u Sarajevu ili organa kod kojeg je registriran podnosilac prijave (općina/komora/ministarstvo) kojim se potvrđuje da nije pod stečajem niti je predmet stečajnog postupka, da nije predmet postupka likvidacije, odnosno da nije u postupku obustavljanja poslovne djelatnosti (potvrda da je aktivan), ne starije od 90 dana od dana objave Obavještenja o Javnom pozivu u "Službenim novinama Kantona Sarajevo" (original ili fotokopija ovjerena od nadležnog organa - općina/notar);
- d) Uvjerenje o poreskoj registraciji - identifikacijski broj (ID broj) izdato od Porezne uprave Federacije BiH (original ili fotokopija ovjerena od nadležnog organa - općina/notar);
- e) Uvjerenje o registraciji obveznika poreza na dodanu vrijednost izdato od Uprave za indirektno/neizravno oporezivanje BiH ili u slučaju da podnosilac prijave nije obveznik po ovom osnovu potrebno je dostaviti uvjerenje Uprave za indirektno/neizravno oporezivanje BiH da isti nije upisan u Jedinstveni registar obveznika indirektnih poreza, ne starije od 90 dana od dana objave Obavještenja o Javnom pozivu u "Službenim novinama Kantona Sarajevo" (original ili fotokopija ovjerena od nadležnog organa - općina/notar);
- f) Obavještenje o razvrstavanju podnosioca prema klasifikaciji osnovne djelatnosti, koje izdaje Federalni zavod za statistiku - Služba za statistiku za područje Kantona Sarajevo prema Klasifikaciji djelatnosti KD BiH 2010 ("Službeni glasnik BiH", broj 47/10) (original ili fotokopija ovjerena od nadležnog organa - općina/notar);
- g) Bilans stanja (izvještaj o finansijskom položaju na kraju perioda) na dan 31.12.2025. godine i bilans uspjeha (izvještaj o prihodima i rashodima) za period od 01.01.2025. do 31.12.2025. godine za pravno lice, odnosno specifikacija za utvrđivanje dohotka od samostalne djelatnosti SPR - 1053 i Godišnja prijava poreza na dohodak GPD 1051 za 2025. godinu za fizičko lice koje obavlja registrovanu djelatnost ili Rješenje nadležne porezne uprave o paušalnom plaćanju poreza na dohodak koje fizičko lice ostvari samostalnim trajnim obavljanjem djelatnosti kao osnovim zanimanjem (originali ili fotokopije ovjerene od nadležnog organa - općina/notar);
- h) Uvjerenje Porezne uprave Federacije BiH o izmirenim obavezama po osnovu poreza i doprinosa sa obaveznim prilogom - Lista osiguranika za obveznika ne starije od 90 dana od dana objave Obavještenja o ovom Javnom pozivu u "Službenim novinama Kantona Sarajevo" (original ili fotokopija ovjerena od nadležnog organa - općina/notar);
- i) Uvjerenje Uprave za indirektno/neizravno oporezivanje BiH o izmirenim indirektnim porezima ne starije od 90 dana od dana objave Obavještenja o ovom Javnom pozivu u "Službenim novinama Kantona Sarajevo" (original ili fotokopija ovjerena od nadležnog organa - općina/notar), izuzev ako je podnosilac prijave dostavio uvjerenje Uprave za indirektno/neizravno oporezivanje BiH da isti nije upisan u Jedinstveni registar obveznika indirektnih poreza iz podtačke e) ove tačke;
- j) Ugovor ili potvrda banke o otvorenom bankovnom računu na ime podnosioca prijave (original ili fotokopija ovjerena od nadležnog organa - općina/notar);
- k) Izjava ovlaštenog lica podnosioca prijave u originalu, ovjerena potpisom ovlaštenog lica, te dodatno ovjerena od nadležnog organa - općina/notar, kojom ovlašteno lice pod punom moralnom, materijalnom i krivičnom odgovornošću potvrđuje:
- da će podnosilac prijave u kojem je ovlašteno lice namjenski utrošiti sredstva ukoliko mu ista budu dodijeljena po ovom Javnom pozivu,
 - da je podnosilac prijave u kojem je ovlašteno lice, u slučaju da je bio korisnik sredstava na osnovu Zakona o poticaju razvoja male privrede ("Službene novine Kantona Sarajevo", broj 29/15), opravdao namjenski utrošak ovih sredstava, a ako nije bio korisnik ovih sredstava da nije bio korisnik ovih sredstava,

- iii. da podnosilac prijave u kojem je ovlašteno lice nije tri godine uzastopno koristio poticajna sredstva Ministarstva privrede Kantona Sarajevo po bilo kojem programu, računajući od zadnje godine u kojoj su mu sredstva odobrena,
- iv. da podnosilac prijave u kojem je ovlašteno lice za predmet poticaja za koji je podnesena prijava po ovom Javnom pozivu nije primio poticajna sredstva putem drugih programa finansiranja/sufinansiranja Vlade Kantona Sarajevo, neke druge institucije u Federaciji BiH ili nevladine organizacije,
- v. da podnosilac prijave i/ili odgovorno lice u podnosiocu prijave i/ili vlasnik/osnivač podnosioca prijave nije u sukobu interesa u smislu Zakona o prevenciji i suzbijanju korupcije u Kantonu Sarajevo ("Službene novine Kantona Sarajevo", br. 35/22, 44/22 i 55/22) u slučaju zaključivanja ugovora o dodjeli poticajnih sredstava na osnovu ovog Javnog poziva
- vi. da je saglasan da rezultat ovog Javnog poziva bude objavljen na web stranici Ministarstva privrede Kantona Sarajevo;
- vii. da je saglasan da Ministarstvo privrede Kantona Sarajevo i Komisija za izbor korisnika poticajnih sredstava po ovom Javnom pozivu mogu obrađivati dokumente kojima se dokazuje njegov lični identitet i lični identitet drugih lica u vezi sa predmetnom prijavom shodno odredbama Zakona o zaštiti ličnih podataka ("Službeni glasnik Bosne i Hercegovine", broj 12/25);

l) drugi dokumenti ako su propisani Javnim pozivom.

3) Posebne isprave i drugu posebnu dokumentaciju, kako slijedi:

- a) predračun/profaktura/ponuda kojom se dokazuje namjena nabavke svake odnosne stavke koja spada u kategoriju prihvatljivih troškova iz Poglavlja IV ovog Javnog poziva, a za koju podnosilac prijave traži refundaciju po ovom Javnom pozivu. Za nabavku mašina, alata, opreme i tehnike (osim mobilnog telefona) koja će se koristiti u vremenu dužem od jedne godine, a koja nije starija od deset godina, podnosilac prijave uz predračun/profakturu/ponudu obavezno dostavlja dokaz o godini proizvodnje predmetne opreme. Kao dokaz, podnosilac prijave obavezno dostavlja: specifikaciju proizvođača sa tehničkim podacima, ovjerenu i potpisanu od strane ovlaštenog dobavljača i/ili izjavu ovlaštenog dobavljača o godini proizvodnje opreme, potpisanu i ovjerenu od strane dobavljača. Ukoliko iz dostavljene dokumentacije nije moguće nedvosmisleno utvrditi godinu proizvodnje, prijava će se smatrati formalno neispravnom.

Napomena 1: U slučaju da podnosilac prijave po ovom Javnom pozivu bude odabran kao korisnik poticajnih sredstava, odnosno da zaključi ugovor o dodjeli poticajnih sredstava sa Ministarstvom privrede Kantona Sarajevo dužan je u ugovorenom roku dostaviti posebne isprave i drugu posebnu dokumentaciju, koja uključuje:

- a) Ugovor i/ili račun uz obavezan fiskalni račun (ukoliko postoji zakonska obaveza za izdavanje fiskalnog računa) ili odgovarajuća kompletna uvozna dokumentacija, uz obavezno prilaganje fotodokumentacije za svaku stavku koja ima karakter materijalnog stalnog sredstva za koju podnosilac prijave traži refundaciju (original ili fotokopija ovjerena od nadležnog organa - općina/notar, osim za fiskalni račun i fotodokumentaciju za koje se prilaže fotokopija);
- b) Ugovor sa certifikacijskom ustanovom za predmetni certifikat međunarodnog standarda (ISO, HACCP, HALAL i drugi prihvatljivi međunarodni standard), predmetni certifikat izdat od ovlaštene certifikacijske organizacije u 2025. godini i/ili dokaz o obnovljenom standardu u 2025. godini i/ili dokaz o osiguranom CE znaku u 2025. godini, za troškove iz Poglavlja IV tačka 3) ovog Javnog poziva (original ili fotokopija ovjerena od nadležnog organa - općina/notar);



- c) Podnosilac prijave na javni poziv dužan je dostaviti izvod iz banke ili potvrdu banke o **realizovanom** nalogu za plaćanje iz kojih je vidljivo plaćanje prihvatljivih troškova na osnovu dokumentacije iz podtačke a), odnosno b) ove tačke. **Izvod iz banke mora biti ovjeren i potpisan od strane podnosioca prijave dok potvrda banke mora biti ovjerena i potpisana od strane banke i podnosioca prijave.**

Napomena 2: Ministarstvo privrede Kantona Sarajevo može prihvatiti određena odstupanja između sadržaja dokumenta iz tačke 3) podtačke a) ovog Poglavlja i odnosnog dokumenta iz tačaka a), b) i c) Napomene 1. ovog Poglavlja, pod uslovom da je stavka na koju se ovaj dokument odnosi odgovarajući ekvivalent stavci nabavke navedenoj u dokumentu iz tačke 3) podtačke a) ovog Poglavlja. Također, odstupanje može biti dozvoljeno i u slučaju promjene dobavljača i promjene cijene, s tim da za odobreni predmet refundacije Ministarstvo privrede Kantona Sarajevo ne može dodijeliti veći iznos sredstava od iznosa sredstava odobrenog odlukom o izboru korisnika sredstava i odnosnim ugovorom o dodjeli poticajnih sredstava. Također, ukoliko je cijena nabavke stavke koja je predmetom refundacije po ovom Javnom pozivu niža u odnosu na dokument iz tačke 3) podtačke a) ovog Poglavlja, Ministarstvo privrede Kantona Sarajevo može refundirati samo iznos do 50% ove cijene. Ukoliko ukupni iznos prihvatljivih troškova bude manji od 3.000,00 KM i/ili ukoliko cijena pojedinačne stavke u nabavci bude niža od 500,00 KM odabrani korisnik sredstava bit će isključen iz procesa dodjele poticajnih sredstava. U slučaju nastupanja opisanih okolnosti iz ove Napomene obavezuje se odabrani korisnik sredstava da obavezno Ministarstvu privrede Kantona Sarajevo uz dokumentaciju iz tačke a), b) i c) Napomene 1. ovog Poglavlja dostavi obrazloženje razloga za odstupanja, a Ministarstvo privrede Kantona Sarajevo zadržava pravo da procijeni opravdanost odstupanja u pogledu ekvivalenta, cijene i dobavljača.

Napomena 3: Kada je u pitanju dokumentacija iz Napomene 1. ovog Poglavlja, račun na kojem nije jasno vidljiva svaka specificirana stavka ili je isti prilikom sačinjavanja fotokopije prekriven fiskalnim računom neće biti priznat kao dokaz prihvatljivog troška.

Napomena 4: Kada je u pitanju dokumentacija iz Napomene 1. ovog Poglavlja, dostavljena ponuda, predračun i troškovnik ne predstavljaju prihvatljiv dokaz troška, a kao dokaz troška ne prihvaćaju se ni nalog za plaćanje, kompenzacija i cesija.

Napomena 5: Poticajna sredstva se neće dodijeliti podnosiocima prijave koji imaju dospjeli dug po osnovu poreza i doprinosa, osim ako je podnosilac prijave umjesto dokaza iz podtačke h) i i) tačke 2) ovog Poglavlja dostavio potpisan ugovor sa Poreznom upravom Federacije BiH i/ili Upravom za indirektno/neizravno oporezivanje BiH o otplati duga na rate sa potvrdom nadležnih organa o uredno izmirenim ugovornim obavezama o otplati duga na rate (fotokopija ovjerena od nadležnog organa - općina/notar).

Napomena 6: Prijava obavezno mora sadržavati sve potrebne isprave i dokumentaciju iz Poglavlja V ovog Javnog poziva, a ove isprave i dokumentacija moraju biti poredane tačnim redoslijedom koji je propisan tim Poglavljem. Prijava mora biti uvezana, a sve strane prijave numerisane i ovjerene pečatom podnosioca prijave i potpisom ovlaštenog lica podnosioca prijave. Prijave koje nisu pripremljene i dostavljene na naprijed propisan način, biće isključene iz postupka dodjele sredstava zbog formalnih nedostataka.

Napomena 7: Ukoliko se naknadno utvrdi da su tvrdnje u izjavi podnosioca prijave iz podtačke k) tačke 2) ovog Poglavlja neistinite, kao i da je druga dokumentacija podnosioca prijave propisana ovim Poglavljem neistinita, prijave se neće uzeti u razmatranje, a ukoliko se ove činjenice utvrde nakon dodjele poticajnih sredstava, podnosilac prijave kojem budu dodijeljena sredstva dužan je izvršiti povrat ovih sredstava sa pripadajućim zakonskim zateznim kamatama.

Napomena 8: Ukoliko dokumentacija iz tačke 3) podtačka a) i tačke 3) Napomena 1 podtačka a) i b) ovog Poglavlja nije sačinjena na jednom od jezika u službenoj upotrebi u Bosni i Hercegovini ista mora biti prevedena i ovjerena od strane ovlaštenog sudskog tumača ukoliko je ovjera moguća.



VI ROK ZA PODNOŠENJE PRIJAVA

Rok za dostavljanje prijave je 30 (trideset) dana od dana objave Obavještenja o Javnom pozivu u "Službenim novinama Kantona Sarajevo", odnosno od 14.05.2026. godine. Javni poziv i prijavni obrazac objavljeni su na internet stranici Ministarstva privrede Kantona Sarajevo: <http://mp.ks.gov.ba/>.

VII MJESTO I NAČIN PODNOŠENJA PRIJAVA

Prijave se podnose u zatvorenoj koverti koja mora biti popunjena elektronskim putem (eliminatorski) direktno na protokol Kantona Sarajevo ili preporučeno putem pošte na adresu: Ministarstvo privrede Kantona Sarajevo, ulica Reisa Džemaludina Čauševića broj 1, sa naznakom "Ne otvarati - po Javnom pozivu za dostavljanje prijave u svrhu dodjele poticajnih sredstava za nova ulaganja u tehnološku modernizaciju i primjenu standarda kvalitete". Na poleđini koverta obavezno je zalijepiti elektronski popunjenu etiketu sa punim nazivom podnosioca prijave, ID brojem, adresom i kontakt telefonom (etiketa je objavljena zajedno sa Javnim pozivom na web stranici Ministarstva), te ovjeriti pečatom.

Prijave koje nisu dostavljene na naprijed propisan način, biće isključene iz postupka dodjele sredstava zbog formalnih nedostataka.

Osim za program "Obezbjedenje kreditiranja pod povoljnijim uslovima" iz Godišnjeg plana, po kojem se izbor krajnjih korisnika poticajnih kreditnih sredstava obavlja u skladu sa javnim pozivom koji objavljuje odabrana banka, subjekt male privrede može podnijeti samo jednu prijavu po samo jednom pojedinom programu dodjele poticajnih sredstava iz Godišnjeg plana. U slučaju da je subjekt podnio dvije prijave po odnosnim programima iz Godišnjeg plana, njegove prijave će biti odbačene odnosno bit će isključen iz postupka dodjele sredstava.

VIII USLOVI I KRITERIJI ZA IZBOR KORISNIKA

Sve dostavljene prijave će se razmatrati komisijski u dva koraka, a u skladu sa propisanim uslovima, pravilima i kriterijima ovog Javnog poziva.

a) Ocjena ispunjenosti uslova

U sklopu ovog koraka, po prijemu i otvaranju prijave, ocjenjuju se sljedeći elementi:

- i. Da li je prijava stigla u utvrđenom roku. Ukoliko nije, prijava se dalje ne razmatra.
- ii. Da li je dostavljen prijavni obrazac, isprave i druga dokumentacija u skladu sa poglavljem V ovog Javnog poziva.
- iii. Ukoliko iznos traženih sredstava podnosioca prijave koji zadovolje uslove iz podtačaka i. i ii. ove tačke, odnosno sve uslove iz ovog Javnog poziva ne pređe limit iz Poglavlja III ovog Javnog poziva, sredstva se dodjeljuju svim podnosiocima prijave koji zadovolje uslove ovog javnog poziva po zaključenju ugovora o dodjeli poticajnih sredstava sa Ministarstvom privrede Kantona Sarajevo.
- iv. Ukoliko iznos traženih sredstava podnosioca prijave koji zadovolje uslove ovog Javnog poziva pređe limit iz Poglavlja III ovog Javnog poziva, sredstva se dodjeljuju shodno pravilima i kriterijima iz tačke b) ovog Poglavlja.

b) Pravila i kriteriji za odabir korisnika sredstava

- i. U slučaju da ostane neutrošenih sredstava na pojedinim pojedinačnim programima iz Godišnjeg plana, ista se mogu prerasporediti na drugi pojedinačni program u okviru ovog Godišnjeg plana, ukoliko se ukaže potreba na osnovu rezultata evaluacije podnesenih prijave. Predmetna preraspodjela sredstava po pojedinačnim programima utvrđuje se odlukom Ministarstva i odnosi se na sve javne pozive za izbor korisnika poticajnih sredstava po pojedinačnim programima: 3.2.2, 3.2.3, 3.2.4, 3.2.5, 3.2.6, 3.2.7 i 3.2.8 iz ovog Godišnjeg plana.



- ii. Ukoliko preraspodjelom sredstava iz podtačke i) ove tačke nije moguće obezbijediti iznose sredstava koji su dostatni, tj. dovoljni shodno zaprimljenim i obrađenim urednim prijavama za pojedinačne programe: 3.2.5, 3.2.6, 3.2.7 i 3.2.8 iz ovog Godišnjeg plana, preraspodjela sredstava u cilju obezbjeđenja sredstava do potrebnog iznosa po pojedinačnom programu, izvršit će se prema sljedećem redoslijedu pojedinačnih programa: 3.2.6, 3.2.7, 3.2.8 i 3.2.5.
- iii. Ako se preraspodjelom sredstava iz podtačaka i) i ii) ove tačke ne obezbijedi potreban iznos sredstava po određenim preostalim pojedinačnim programima iz redoslijeda iz podtačke ii) ove tačke, podnosioci prijave po tim pojedinačnim programima mogu ostvariti pravo na poticajna sredstva u proceduri ocjenjivanja prijave prema sljedećim kriterijima: A - Vrsta djelatnosti (četiri grupe, maksimalno 30 bodova); B - Broj zaposlenih (osam grupa, maksimalno 40 bodova); i C - Ostvareni prihod (četiri grupe, maksimalno 30 bodova).
- iv. Nakon izvršenog bodovanja iz podtačke iii. ove tačke, za grupu aplikanata koji ostvare broj bodova koji se u cijelosti nalazi unutar definiranog limita sredstava po pojedinačnom programu (Grupa I), bit će isplaćen cjelokupan iznos sredstava traženih u pojedinačnim prijavama ovih aplikanata.
- v. Za preostala sredstva formira se Grupa II od preostalih aplikanata sa najvećim brojem bodova. Ovim aplikantima sredstva će biti isplaćena proporcionalno iznosu sredstava iz pojedinačnog zahtjeva aplikanta i sredstava koja su preostala nakon raspodjele sredstava iz podtačke iv) ove tačke. Iznos sredstava koji će biti isplaćen po pojedinačnom aplikantu iz Grupe II obračunava se na sljedeći način: (Ukupan preostali iznos sredstava do definiranog limita sredstava po pojedinačnom programu/Ukupan traženi iznos sredstava svih aplikanata iz Grupe II) x (Pojedinačni traženi iznos sredstava aplikanta iz Grupe II).

Tabela 4. Kriteriji za izbor korisnika sredstava

R/b	Kriterij	Vrsta djelatnosti	Broj bodova	Izvor verifikacije
1.	Vrsta djelatnosti (dozvoljene šifre u Području djelatnosti prema KD BiH 2010)	Područja C, D i F (za šifre djelatnosti iz Tabele 1. ovog Javnog poziva)	30	Obavještenje o razvrstavanju poslovnog subjekta prema KD BiH 2010
		Područja J, M, P i Q (za šifre djelatnosti iz Tabele 1. ovog Javnog poziva)	25	
		Područja E, G, H i I (za šifre djelatnosti iz Tabele 1. ovog Javnog poziva)	20	
		Područja N i S (za šifre djelatnosti iz Tabele 1. ovog Javnog poziva)	15	
2.	Broj zaposlenih	više od 50	40	Potvrda PU i Lista osiguranih lica za obveznika
		31 do 50	35	
		21 do 30	30	
		16 do 20	25	
		11 do 15	20	
		7 do 10	15	
		4 do 6	10	
		1 do 3	5	
3.	Dobit/dohodak	Više od 150.000,00	30	Bilans stanja i bilans uspjeha, odnosno Obrazac SPR-1053 i Godišnja prijava poreza na dohodak GPD 1051
		75.000 do 150.000,00	25	
		50.000 do 75.000,00	20	
		Do 50.000,00	15	
		Fizičko lice koje samostalno obavlja registrovanu poslovnu djelatnost kao osnovno zanimanje, a porez na dohodak plaća u paušalno utvrđenom iznosu	5	Rješenje nadležne porezne uprave o paušalnom plaćanju poreza na dohodak

Napomena: Podnosilac prijave koji u dostavljenim finansijskim izvještajima ima iskazan gubitak, vezano za kriterij 3. Tabele 4. ocjenjuje se sa 0 bodova.

IX NAMJENA UTROŠKA SREDSTAVA DODIJELJENIH PO JAVNOM POZIVU

Korisnik sredstava je obavezan da odobrena i dodijeljena sredstva po ovom Javnom pozivu utroši za jačanje konkurentnosti i poticaj razvoja postojećeg poslovnog subjekata, ekonomsku stabilnost poslovnog subjekta, održavanje postojećih radnih mjesta, novo upošljavanje, pokretanje nove i održavanje postojeće proizvodnje, unutrašnje uređenje poslovnog prostora koji je fizički odvojen od stambenog dijela i ukoliko je izvođač odnosnih radova uređenja poslovni subjekt registrovan za obavljanje tih radova, povećanje izvoza, dobijanje i obnavljanje odgovarajućih certifikata. Korisnik sredstava je obavezan dostaviti dokaze o utrošku sredstava za: tehnološku modernizaciju i inovaciju poslovnih procesa, te za uvođenje sistema međunarodnih standarda kvalitete, kupovinu mašina, tehnike (osim mobilnog telefona), alata i opreme koja se koristi duže od jedne godine. Korisnik sredstava je dužan opravdati utrošak dodijeljenih poticajnih sredstava sa odgovarajućom dokumentacijom datiranom nakon izvršene doznake sredstava na račune korisnika po ovom Javnom pozivu, što će biti definisano ugovorom. Ministarstvo privrede Kantona Sarajevo će za sva neopravdana sredstva pokrenuti proceduru povrata sredstava uz pripadajuću zakonsku zateznu kamatu. Korisnik poticajnih sredstava obavezan je zadržati broj uposlenih koji je imao na dan podnošenja prijave do trenutka podnošenja izvještaja o realizaciji utroška dodijeljenih poticajnih sredstava, što dokazuje dostavljanjem uvjerenja Porezne uprave Federacije BiH o izmirenim obavezama po osnovu poreza i doprinosa zajedno sa listom osiguranih osoba za obveznika uz odgovarajući Izvještaj o utrošku dodijeljenih poticajnih sredstava.

X OSTALE ODREDBE

Sa odabranim korisnicima Ministarstvo privrede Kantona Sarajevo zaključuje ugovor o dodjeli poticajnih sredstava, nakon čega se sredstva doznačavaju na dostavljene račune korisnika. U skladu sa ugovorom korisnici sredstava dužni su u roku i na način propisan ugovorom za sve aktivnosti dostaviti Izvještaj sa traženim dokazima o namjenskom utrošku poticajnih sredstava. Podnosilac prijave, tj. korisnik je obavezan da se prilikom implementacije sredstava pridržava svih pozitivnih zakonskih propisa koji se primjenjuju u Bosni i Hercegovini, Federaciji Bosne i Hercegovine i Kantonu Sarajevo, a Ministarstvo privrede Kantona Sarajevo se obavezuje da vrši nadzor nad provođenjem ugovornih obaveza iz ovog ugovora, uvidom u odnosnu dokumentaciju u vlastitim prostorijama i kod korisnika sredstava, a u slučaju potrebe i uvidom u podatke pribavljene službenim putem od strane odnosnog nadležnog organa. Ministarstvo privrede Kantona Sarajevo pri vršenju nadzora poduzima mjere iz svoje nadležnosti, a u slučaju kada činjenično utvrdi razlog za poduzimanje odnosne mjere ili utvrdi postojanje osnovane sumnje da postoji krivična odgovornost određenog lica, u njegovom postupanju prije i nakon zaključenja ugovora, Ministarstvo privrede Kantona Sarajevo će bez odgađanja pokrenuti postupak utvrđivanja krivične odgovornosti tog lica. U postupku po ovom Javnom pozivu Ministarstvo privrede Kantona Sarajevo zadržava pravo da dostavljene prijave za pojedinačne programe iz ovog Javnog poziva prihvati u cijelosti, djelomično, ili ih odbije, te da poništi ovaj Javni poziv, ili da odbaci sve programe/projekte, u bilo koje vrijeme prije zaključenja ugovora. Ministarstvo privrede Kantona Sarajevo ne snosi odgovornost prema učesnicima ovog Javnog poziva, u pogledu aktivnosti koje su preduzeli u cilju podnošenja prijave za određeni program. Podnosilac prijave po ovom Javnom pozivu, u cilju zaštite svojih prava, može dostaviti pisani prigovor Ministarstvu privrede Kantona Sarajevo, u roku od osam dana od dana objave preliminarnog prijedloga korisnika poticajnih sredstava. Po ovom prigovoru rješava Ministarstvo privrede Kantona Sarajevo, najkasnije u roku od 15 dana.

Napomena: Zahtjev za dodatne informacije po određenim pitanjima iz ovog Javnog poziva se može podnijeti putem telefona: **033/258-132 i 033/258-135**, svakim radnom danom od 14:00 do 16:00 sati.





Dostavljeno:
1. Evidenciji i
2. Arhivi.



Adresa: Reisa Džemaludina Čauševića 1, 71 000 Sarajevo
Tel: + 387 (0) 33 562-122, Fax: + 387 (0) 33 562-226
Web: <http://mp.ks.gov.ba>, E-mail: mp@mp.ks.gov.ba

